



*Selasa, 18 Mei 2021*

**Ogen: Perbahanen Rasul 15:6-9**



**Tangkas Ulih Si Mehuli**



Perdalanen sejarah gereja mereken erbage-bage cataten sejarah kerna perdalanen berita si meriah, perdalanen organisasi, tantangan, perbeben i bas ndalanken dahin e. Keriahen ukur, iluh mambur, arapen si isuan ken jadi ingeten si mpegegehi kerina kalak si tek. Enda me gelementa seh paksa enda, maka la ateta aru i bas ngelai ras muat bagin i bas dahin pelayanen si lit amin lit nge erbage tantangan si reh tetap kita semangat bagi si megati jadi mottota 'semakin dibabat semakin merambat.'

I bas renungenta wari enda ituriken maka erbage-bage persoalen siturah i bas perpulungen pemena paksa e idungi alu runggu, arih-arih. Erbage kebiasaan, sunat si arus ilakoken man kalak si la Jahudi ras erbage pertentangan, pendapat jadi i je, si ndekah la erkedungen. Guna ndungisa perlu kal mpeturah kedewasan i bas ngalaken persoalen gelah la jadi perpecahen janah enda jadi benih organisasi erpalasken kata Dibata seh paksa enda ngalaken persoalen.

MUPEL Moria GBKP i bas wari peduaken enda banci ilakoken arah dukungan ras toto kerina peserta, panitia bagepe Moria GBKP. Janah arah Musyawarah Pelayanen enda siarapken ndatken ulih eme keputusan-keputusan si jadi ulih MUPEL jadi program man Moria GBKP i bas kerina wilayah pelayanen GBKP. Radu ras kita ngukuri, nikapken kerina program e, radu ras ka kita kari ndahikenca. Arah enda Moria GBKP banci tetap jadi pasu-pasu nandangi doni enda. Ulih si mehuli enda tentuna idatken arah proses perukuren, percakapen, diskusi, si luar biasa. Kerina peserta mereken ukurna guna kiniulin Moria GBKP, amin i jah i je lit kekurangan, tapi enda jadi kesempatan man kerina panitia, peserta rikut ras BPP Moria erlarjar guna ndatken ulih singena ate Dibata.